

## 2 TIMOTEO

### *Timoteodih ã túyat tútat*

<sup>1</sup> Weém, Pablo, Jesucristoíh doonádih Dios ã naáwát túttni jumna, nin náodih meém Timoteodih wã jwúub daác wahna caá. “Nihat Jesucristodih jepahnit wãjeéh ĩ túi jum̄bipna caá”, ã niijátjidih bitadih Dios weemdíh ã naóh bohéát tútup jĩ. <sup>2</sup> Timoteo, wã wãúh panihni ma jum̄chah, meemdíh búdí wã oina caá.\* Dios jwĩ íip, jwĩ Maáh Jesucristo biícđih meemdíh oinit, ĩ jĩgah en teo wáaca naáh, ma túi jum̄at pínah niijná.

### *Pablo Diosdih “Túina caá”, ã niiját*

<sup>3</sup> Diosdih úbhna, yeó jáap, chei jum̄at pahbut meemdíh wã úbhna caá. Pánih úbhnit, “Timoteodih búdí ma teo wáacatđih túina caá, Paá”, wãpĩ niijná caá. Caán Diosdih tigaá jwĩ ñowã wēinit, ĩpĩ jepahat pahjeh m̄ntih, weembút caandíh wēinit, wã jepahna caá. Pánih jepahnit, dedé yeejép chājat peéh weemdíh ã wihcatđih wã jéihna caá. <sup>4</sup> Con láa meemdíh wã cádah bejehchah, ma jum̄nátjidih náhninit, majeéh jum̄nit, túi weñat túat niijná, meemdíh wã jwúub eníhna caá. <sup>5</sup> Meém Jesúsđih ma túi jenah joyátđih wã náhnina caá. Ma éet Loida, ma ín Eunicebut Jesúsđih ĩt jwĩh jepahap tajĩ. Pánihna, queéđđih en yacnit, meembút caandíh ma túi jenah joiná caá.\*

<sup>6</sup> Meemdíh wã teo jãha úbúchah, Dios meemdíh ã wēpatđih búdí át wūhap jĩ, ã watat pah bitadih

\* **1:2** Hch 16.1; 1Ti 1.2      \* **1:5** Hch 16.1

ma túi teo wáacat pínah niijná. Páant ã chãjatjidih náhninit, ãmcanjeh, ã wêpatjĩh bitadiah chah ma teo wáacá. <sup>7</sup>Dios jwiít dih Túini Espíritudih át wãhup be, jwĩjeéh ã jumat pínah niijná. Pánih jwĩjeéh jumni Túini Espiritu jwiít dih búdí ã teo wáacna caá, cãacwã ded pah ĩ jenah joyát dih jwĩ ãmcat pínah niijná. Páant ã teo wáacachah, cãacwãdih oinit, ã wêpatjĩh queétdih jwĩ jéih teo wáacna caá. Caán Túini Espiritujeh jwiít dih ã túi jenah joyát túutna caá. <sup>8</sup>Pánihna, jwĩ maáih doonádih bitadiah naóhna, ma tíic jenah joicá bojoó. Weém ãih doonádih wã bohéat jíib nemat mũúboó wã jumuchah, wã chéen ma jumatdihbat ma tíicca bojoó. Obohjeéhtih, túini doonádih ma bohéat jíib meemdíhbat yeejép ã yapachah, “Á túimi nacaá”, ma niiji. Páant ã yapachah, Dios meemdíh ã teo wáacnipna caá, caandíh ma cádahcat pínah niijná. <sup>9</sup>Jwiít iiguípna bejnit déejidih Diosjeh jwiít dih át túi ubup wut jĩ. Pánih túi ubnit, jwiít dih át ñíwip wut jĩ, ãihwã jumnit, jwĩ túi chãjat pínah niijná. Obohjeéhtih, jwĩ túi chãjat jíib át ñíocap wut jĩ. Nin baác dih ã chãjat pínah jãtih ã jenah joyátji pah jwiít dih oina, át ñíwip wut jĩ. Pánih oina, jwiít dih túi ubni pínah Jesucristodih ã wah deyaat pínahdih át jenah joyóp wut jĩ. <sup>10</sup>Pánih jenah joiníji caandíh wah deyana, ã oyatdih jwiít dih ã túi jéihyana caá. Páant ã wah deyani Jesús jwiít ãihwãdih iiguípna jwĩ bejat déejidih át túi ubup wut jĩ. Caán Jesús dih jepahna, páantjeh Diosjeéh jwĩ túi jumat pínah doonádih jwiít dih naáwádih át dei jãúwup wut jĩ.

<sup>11</sup> Weemdíh ñíonit, Dios ã wahap jĩ, caán túini

doonádih wā naáwát pínah niijná.\* 12 Páant ã wutaditih wā jepahatji jíib b̄n̄n̄ nin nemat m̄úboó jum̄nit, yeejép wā yapna caá. Obohjeéhtih, pánih yeejép yapna yuhna, wā tíic jenah joicán caá. “Wā jepahni Jesús túi wēp̄ni jum̄na, ãih doonádih naáwát túatnit, weemdih ã túi teo wáac̄ipna caá. Páant ã teo wáacachah, p̄úú ã jw̄úub dei j̄úwúchahna, caandih túi jenah joí cádahcan, páantjeh ãih doonádih wā naóh̄ipna caá”, wā niij jenah joiná caá.

13 Meémboó Jesucristodih túi jenah joiná, caandih oinit, meemdih yoobóp̄dih wā bohéatji pah ma ch̄j cádahca bojoó. 14 Jw̄j̄eéh jum̄ni Túini Esp̄ritu ã teo wáacat̄j̄ih Dios meemdih ã naáwát túatnidih yoobóp̄dih ma bohénaá. Caandih túi náhn̄nit, mácah ma bohéca bojoó.

15 Nihat Asia baác̄dih moón Jesúihwā weemdih cádah tigaá it ch̄jap. Pánih tigaá i jw̄úub jígoch̄ap. Ījeéh Figelo, Hermógenes w̄t jum̄nitb̄t i cádahatdih ma jéihna caá. 16-17 Páant queét nihat weemdih i cádahachah yuhna, Onesíforoboó dawá láa weemdih enedih jun̄it, ã túi weñanap be. Nemat m̄úboó wā jum̄uchah yuhna, Roma tútchiboó jun̄it, wā chéen ã jum̄atdih tíic jenah joicánjeh, weemdih maatápdih bidniji weemdih ã bid juyúp j̄i. Páant weemdih ã túi teo wáacat jíib, ã déewādih jw̄i Maáh ã j̄jgah en teo wáaca naáh.

18 Éfeso tútchiboó jw̄i jum̄uchah, weemdih búdí ã teo wáacat̄jidihb̄t ma túi jéihna caá. Pánihna, jw̄i Maáh Jesús̄dih búdí wā úbhna caá, nin baácboó jw̄úub dei j̄úóh̄nit, caandih búdí ã j̄jgah en teo

\* 1:11 1Ti 2.7

wáacat pínah niijná.

## 2

### *Jesúh tãini soldado panihni*

<sup>1</sup> Meémboó, wã wãúh panihni, Jesucristo meemdíh oinit, ã teo wáacachah, caandíh ma túi péenaá. <sup>2</sup> Dawá wã bohéatdih joiníji meem jwúh bitadilh ma bohénaá. Páant queétdih ma bohénachah, Dios ã náahat pah túi chãjnit, bitadilh bohé jéihnitbat ï jamu naáh.

<sup>3</sup> Soldadodih buwat ã jamuchah yuhna, ã cádahcat pah muntih, meemdíhbat biíc yoobó ã yapachah, Jesúsdi h ma cádahca bojoó. Jwiít ni hat Jesúhwãdih biíc yoobó ã yapna caá. <sup>4</sup> Ded soldado ã maáhdih weñáhnna, ã wutat pahjeh caá ã chãjap. Soldado nihcanni ã chãjat pínahdih páantjeh chãjna, ã maáh ã wutat pah áta jéih chãjcan tagaá. Pánihna, soldado ã chãjat pah muntih, meembút Dios ã weñat pínahdihjeh jenah joinít, ã wutat pah ma túi chãjaá. <sup>5</sup> Pánihat dée, ded ñáoni maáta ï wutat pah túi chãjni jeh, ã wëp ñáwat jíibdih ã jéih bíbohna caá. Pánihna, ñáoni ã túi chãjat pahjeh muntih, Jesucristo ã wutat pah ma túi chãj cádahcat jíib, ã pebhna ma juibínachah, meemdíh túinidih ã wãhbi pna caá. <sup>6</sup> Pánihat dée muntih, wápchi túi teoniboó ã tewat jíib jeémátdih jwíih bíbohat caá náahap. Pánihna, Dios meemdíh ã wutat pah ma túi chãjat jíib, ã pebhboó ma juibínachah, meemdíh wëinit, ã túi chãjbi pna caá. <sup>7</sup> Wã niijátjidih ma túi náhninaá. Páant ma náhninachah, jwí Maáh meemdíh ã túi jéihyabipna caá.

<sup>8</sup> Ded pah Jesucristo ã jumatjidih ma quíib buudcá bojoó. Caán maáh David jumima ãt jumap wat jĩ. Wunna yuhna, ã jwúub boo pad júúwátji táini doonádih wãpĩ bohénap jĩ. <sup>9</sup> Pánih caandíh wã bohéat jíib, yeejép chãjnitdih ĩ nemat pah, weemdíh ĩtah tãpjĩh chéonit, nemat muúboó ĩ nemechah, wã moh yéejna caá. Pánih jumna yuhna, Dios naáwát dih wã bohé cádahcan níit. <sup>10</sup> Dios ã ñionitdih bohéna, yeejép wãpĩ yapna caá, queébtat Jesucristoíhwã ĩ jumat pínah niijná. Āihwã iiguípna bejnit déejidih ã túi ubnit pínah ĩ jumuchah, queét Diosjeéh ĩ túi jumbipna caá.

<sup>11</sup> Nin naáwát yoobóp dih caá:

Cristo jwĩ yéejat jíib ã wun wūhat pah muntih, jwiítbut ãjeéh wunnit panihnit, yéejatdih cádahnit jwĩ jumna caá. Pánih cádahnit, ãjeéh jwúub boo pad júóh nit panihnit, ãjeéh páantjeh jwĩ jumbipna caá.

<sup>12</sup> Āihwã jwĩ jumat jíib yeejép yapna yuhna, ã náahat pah jwĩ chãj cádahcan, ã maáh jumapboó caán bíicdih jwiítbut maáta jwĩ jumbipna caá.\* Obohjeéhtih, “Jesucristodih wã jéihcan caá”, jwĩ niijíchah, caanbút jwiít dih bíic yoobó ã niijbípna caá.\*

<sup>13</sup> Jwiít jwĩ niijátji pah jwĩ chãjcah yuhna, caánboó ã niijátji pahjeh ã chãjbipna caá. Yeecanni jumna, ã niiját pahjeh chãjni ã jumna caá.

*Diosdih túi teo wāhni ded pah ã jumat*

<sup>14</sup> Majeéh jumnit Jesúíhwādih buutéh wã naáwát dih ma túi náhnianaá. Dios ã enechah,

\* **2:12** 1P 5.1 \* **2:12** Mt 10.33; Lc 12.9

queédih ma míc jūihcat túutú. Ī jengah joyátjīhjih ĩ míc jūihñachah, dedé pínah nihcan caá. Pánih jūihna, teo wáaccan, míc yéejana caá ĩ chājap. Ī míc jūihñatdih joinít, ĩ bəwa jengah joiná caá. <sup>15</sup> Dios naáwát dih túi jéihnit, caán meemdih ā wətat pah, bitadih āih túini doonádih yoobópdih ma bohénaá. Páant ma chājachah ennit, “Ma túi chājna caá”, Dios ā niijíchah joinít, ma tíccan niít.

<sup>16</sup> Diosdih jéihcannitboó ĩ jengah joyátjīhjih ĩ míc wéhenachah, ma joyáh bojoó. Páant ĩ míc wéheat dedé pínah nihcah, chah ĩ yéej chāj bipna caá. <sup>17</sup> Páant ĩ yee bohéat, yahwít ā moóp aabát pah, bitadih ĩ yéejana caá. Páant tigaá Himeneo, Fileto wət jumnitbut ĩt chājap. <sup>18</sup> Páant ĩ yee bohéatdih joinít, Dios naáwát yoobát dih ĩt cádahap wət jī. Pánih cádahnit, “Jesúhwā jáantjeh ĩtát pūuh laab béjep be”, queét ĩt niij yee bohénap wət jī. Pánih mácah bohénit, biquína Jesúhwādih ĩ yéejanachah, caandih ĩt cádahap wət jī. <sup>19</sup> Obohjeéhtih, páant ĩ yee naóh bohénachah yuhna, Dios naáwátboó yoobópdih ā jumna caá. Caán ā túut nūumcán niít. Páantjeh biíc yoobó ā jumbipna caá. Nin pah Dios naáwát dih naóh yapani āt niij daacáp tajī: “Jwī Maáh āihwādih ā jéihna caá”, āt niij daacáp tajī.\* “Jesús wā Maáh caá”, niijnítboó, yeejép ĩ chājatdih ĩ cádaha naáh”, biihboó āt niij daacáp tajī.

<sup>20</sup> Jwiít Jesúhwā nin pah caá jwī jumap: Búdí mūúboó dawá pamapna ā jumna caá. Biquína oro, platajih ĩ chājniji jum, biquína máa naá, wám déepjih ĩ chājnijibut ā jumna caá. Pánihna, caán mūú mínah cāacwādih numah jeémpnit, āih oro, platajih

\* **2:19** Nm 16.5; Jn 10.14; 1Co 8.3

ĩ chãjniji pamapnadih wēi ennit, ĩ jeémát pínahdih ã cáagna caá. Obohjeéhtih, máa naá, wáam déepjĩh ĩ chãjnijiboó yeó jáap jumat pah jeémát cáagat pínah, ĩ yohnidih ĩ yacat pínahbut ã jumna caá. <sup>21</sup> Pánihat pah, ded yeejép ã chãjatdih cádahnit, oro, platajĩh ĩ chãjniji pamap panihni jumna, jwĩ Maáh ã weñat pínahdih ã jéih chãjbipna caá. Páant ã chãjachah, jwĩ Maáh caandíh ã wēi enbipna caá.

<sup>22</sup> Meémboó jáap jumna, japata ĩ yéej chãj ñinahatdih enna, iinít, biáboó ma bejeé. Pánih iinít, táiniboodíhjih chãjna, jwĩ Maáh Jesúsdi h chah jenah joinít, bitadih ma túi oyoó. Pánih oinit, míic jũihcanjeh, ĩjeéh ma túi jumúú. Nihat Jesúsdi h tái úúbhñitbut biíc yoobó ĩ chãja naáh. <sup>23</sup> Jenah joicánnit ĩ míic jũihñuchah, ma joyáh bojoó. Beh joicánjeh, míic úúbh joinít, queétjeh chah ĩ míic jũihna caá. <sup>24</sup> Obohjeéhtih, Dios naáwát di h bohéniboodí h míic jũihcat caá náahap. Pánih jũihcan, nihat di h tái chãjnit, tái bohénit, biíc mantjeh íjcan táinijeh jumat caá náahap. <sup>25</sup> ã naáwát di h joíihcan, mácah niijnít di h íjcanjeh tái bohéat caá náahap. Páant táinijeh ñi bohénachah joinít, Dios ã teo wáacatjĩh ĩ yap yohat di h cádahna, táini bohéatboodí h “Caán yoobópdih caá”, ĩ niij jenah joibípna caá. <sup>26</sup> Pánihna, yoobópdih bohéat di h joinít, queét nemépwā ĩ maáh ã náahat pah chãjnitji caandíh ĩ cádahbipna caá. Pánih cádahnit, ã jwáúú yéej chãjat táutuchah yuhna, yoobópdih bohéat di h jepahnit, ã wútatboodí h ĩ jepahcan niít, buca.

### 3

*Péeni yeó jáap di h ded pah cãacwã ĩ jumat pínah*

1 Bũũ, Timoteo, nindihbut ma túi náhninaá: Jesús ã jwúub dei jũúwát pínah jãtih, cãacwãdih búdí bũwat ã jũmbipna caá. 2 Caán láa, cãacwã bitadiah teo wáacat pínahdih jenah joicán, ã weñat pínahdihjeh ã jenah joibípna caá. Pánih jenah joinít, dawá bíí déedih ã bidbipna caá. “Nihatdih jéihna, bitadiah chah wã jũmna caá”, niúj jenah joinít ã jũmbipna caá. Cãacwãdih, Diosdihbut yeejép wéhenit, ã mánadihbut yap yohnit ã jũmbipna caá. Bitá queédih ã túi chãjachah yũhna, “Túina caá”, niijcánnit ã jũmbipna caá. Diosdih wẽicanjeh, búdí yeejép chãjnit ã jũmbipna caá. 3 Cãacwãdih oican, ã jĩgah en teo wáaccan niít. Yeejép doonádih naóhñit ã jũmbipna caá. ã jenah joyátjĩhjih yeejépdih ã jéih chãj cádahcan niít. Cãacwãdih tabit yeejép chãjnit, táiniboodíh ã en iibípna caá. 4 ã chéenwãdih yah buca yeejép ã chãjbipna caá. Jenah joicánjeh chãjnit, “Jéih beedáni caá”, niúj jenah joinít ã jũmbipna caá. Queét ã weñat pínahdihjeh chãjnit jũmna, Diosboodíh náahcannit ã jũmbipna caá. 5 Cãacwã ã enechah, Diosdih túi wẽinit pah jíghñit jũmna yũhna, ã jenah joyátdih ã túut nuumát pínahdih ã náahcan niít. Pánihnitdih ma pej jũmca bojoó.

6 Biquína pánih chãjnit bitaíh mũunádih waadnít, “Dios naáwátdih yeebdíh bohénadih wã jũúwáp be”, caanjĩh jũmñit yaáhdih ipĩ niúj yeena caá. Páant ã niúj yeenachah yũhna, queét yaádh túi jenah joicánnit, yeejép chãjnit jũmna, ã yee bohéátdih ã wẽi joiná caá. Queét yaádh búdí ã yéej chãjĩhna caá. 7 Pánihna, dedé mácah yee bohéátdih joíhna, Dioíh yoobópdih bohéátboodíh ã náahcan caá. 8 Jon jãtih Egiptodih moón jióhñitji, Janes,



Jambres wūt jumnit, Moisésdih ãt yap yohíhip wūt yuh jĩ.\* Páant ã yap yohíhat pah muntih queét yaáhdih yee bohénitboó túini bohéátdih ã en iiná caá. Queét yeejépdihjeh jenah joinít ã jumna caá. Pánih jumna, Jesúsdihtúí jenah joicán, áihwã yoobát ã nihcan caá. <sup>9</sup> Queét ã yee bohé jibichah yuhna, daocánnitjeh queétdih ã jepahbipna caá. ã yee bohéátdih “Caán yeejép bohéát caá”, cáacwã ã níj jéhibipna caá. Janes, Jambresjĩh ã yeeatjidih jon játih moón ã jéhiyat pah muntih, Jesús ã jwáub dei jūwát pínah játih jumnitbut ã yeeatdih ã jéhibipna caá.

### *Timoteodih ã jwáub wutat*

<sup>10</sup> Obohjeéhtih, ded pah wã bohéát, wã jummat, wã jenah joyátdihbut meemjéh ma túí jéihna caá. Jesúsdihtúí jenah joyátdih, íjat wihcanjeh cáacwãdih oina wã teo wáacat, yeejép yapna yuhna wã cádahcatdihbut ma jéihna caá. <sup>11</sup> Weemdih yeejép ã chãjachah, búdí wã yéj chūúátjidihbut ma jéihna caá. Antioquía, Iconio, Listra tútchinaboó Jesúsdihtúí donádh wã jib bohéát jíib, weemdih yeejép ã chãjatjidihbut ma jéihna caá. Obohjeéhtih, ã mawíhichah yuhna, jwĩ Maáh Jesúsboó weemdih ã wapachah, ã jéih maocap jĩ.\* <sup>12</sup> Páant weemdih ã chãjat pah, nihat Jesucristoihwã caandih ã túí péeat jíib, bita queétdihbut yeejép ã chãjat pínahdihbut jwĩ jéihna caá. <sup>13</sup> Yeejépwã, yeenitbut chah yeejép chãjnit ã jumnipna caá. Bitadihtyeena, queétjehbut ã yeeatdih joiná, chah yeejép ã jumnipna caá.

\* **3:8** Ex 7.11      \* **3:11** Hch 13.14-52; 14.1-20

14 Obohjeéhtih, ma éet, ma íin, weembút meemdíh jwĩ bohénachah joiná, meémboó mat táí jepahap wat jĩ. “Weemdíh bohénit yeenit nihcan caá”, niíj jéihnit, yoobópdih jwĩ bohéátjidih táí náhninit, ma pée cádahca bojoó. 15 Meém wébít jum láa, Dios naáwát dih mat jéih jwíhip wat jĩ. Pánih jéihnit, Jesucristodih táí jepahnit, iiguípna bejni déejidih Dios ã táí ubni ma jumna caá. 16 Dios naáwát dih nihat daácnitdih “Nin pah ma niíj daacá”, Diosjeh át niíj daacát túutup wat jĩ. Pánihna, ã daacátjidih jwiútdih bohéat caá náahap, yoobópdih naáwát dih jwĩ táí jéihyat túut niíjná. Pánih jéihnit, “Caán yeejép wã chãjatdih cádahat caá náahap”, jwĩ niíj jéihna caá. Caandíh bohéna, táiniboodíh jwĩ jéih túut nuumná caá. Pánihna, yeó jáap jummat pah táí chãjat túut niíjná, ã naáwát dih bohéat caá náahap. 17 Ded Dios naáwát dih táí míic bohéna, nihat táinidih ã jéih chãjbipna caá.

## 4

1 Jesucristo, nihat cãacwã ã Maáh jwúub dei jũóhna, báadhnit, wannitbut ded pah ã chãjatji jíib ã naóhbipna caá. Pánihna, caán, ã íip Diosbut ã enechah, meemdíh nin pah wã wěp naóhna caá: 2 Yeó jáap jummat pah cãacwã ã joíhichah, ã joíhcah yuhna, Dios naáwát dih páantjeh ma bohénaá. Pánih bohéna, cãacwã ã yéej chãjatdih jéihyanit, “Jwúub yéej chãjcanjeh, táiniboodíh ñi túut nuumá”, ma niíj naáwá. Pánih naóhnit, chũucánjeh, queétdih ma táí bohé cádahca bojoó. 3-4 Túttimah bóo láa, cãacwã táini bohéát dih ã joíhcan niít. Pánih joíhcan, ã náahatdihjeh chãjéhna, ã weñat pínah bohéát dihjeh joíhnit, mácah bohénitboodíh bádí ã

bidbipna caá. Páant ï bidichah, dawá queédih ï yee bohéipna caá. Túini bohéatdih cádahnit, mácah bohénit ï jenah joyátjĩhjih ï bohéatboodih ï joibípna caá. Pánihna, waícanjeh páant ã yapat pínahdih jéihnit, meémboó Dios naáwát, yoobópdihi jumnidih, ma bohé cádahca bojoó. <sup>5</sup> Pánih bohénit, queét yeenit pah chājcat túut niijná, túi jenah joiní ma jumúú. Yeejép yapna yuhna, bíic yoobó chājnit, túini doonádih ma bohé cádahca bojoó. Pánih cádahcan, Dios meemdih ã wutat pah ma túi chāj péanaá.

<sup>6</sup> Weém Dios ã wutat pah, ã naáwát dih wã jib bohéatji jíib weemdih ï mao yohat pínah bahnijeh caá ã jũhdũp. <sup>7</sup> Wã wunat pínah jãtjih nin pah meemdih wã naóhna caá: Jesúih túini doonádih Dios weemdih ã bohéat túutachah, wã túi bohénap be. Nihat ã wutat pah wã chāj péanap be. Pánih chājnit, yeejép yapna yuhna, caandih wã túi jenah joí cádahcap be. <sup>8</sup> Pánihna, wã túi chājatji jíib jwĩ Maáh jeáboó ã bíboh pãina nacaá. Nihat cáacwã ded pah ï chājatdih jéih beedána, yoobópdihi jíib wũhni jumna, ã wutatdih wã túi jepahatji jíib, ã jwũub dei jũóhni yeó jáapdihi weemdih ã túi chāj bipna caá. Bitá caandih oinitbut ã jwũub dei jũúwát pínahdih túi pãinit ï jumuchah, jwĩ Maáh Jesús bíic yoobó queédih ã túi chāj bipna caá.

*Timoteo ded pah ã chājat pínah*

<sup>9</sup> Waícanjeh wã pebhna ma jũúwú. <sup>10</sup> Demas wũt jumni chah dawá bíi déedih náahna, weemdih cádahnit, Tesalónica tútchina ã jwũub bejep be.\* Crescente wũt jumni Galacia baácna ã bejehchah,

\* **4:10** Col 4.14; Flm 24

Tito wūt jum nibut Dalmacia baácna ã bejep be.\*  
 11 Páant ï yoh bejat túttimah, Lucasjeh caá wãjeéh  
 ã chãwáp.\* Pánihna, bita teo wáacnitdih náahnit,  
 meemdíh wã jũúwát túutna caá. Pánih jũóhnit, Mar-  
 cosdihbut ma namah jũúwá.\* Cristoíh doonádih  
 wã bohénachah, weemdíh túi teo wáacni pínah caán  
 ã jum bipna caá. 12 Tíquicodih Éfeso tútchina wã wa-  
 hap be.\* 13 Ninna jũóhna, Troas tútchiboó\* Carpo  
 wūt jumniíh mædíh wã jwej jũóhni cúbuh jweyát  
 chóodih, wíih papélah tólihnadibut ma ub jũúwá.  
 Wíih papélah náonadibh báciah búdí wã náahna caá.  
 Pánihna, caandíhbut ma ub jũúwá.

14 Alejandro wūt jumni ítahdih teoni weemdíh  
 búdí yeejép ã chãjap be.\* Páant ã chãjatji jíib Dios  
 caandíh ã peéh chãjbipna caá.\* 15 Caán Alejandro  
 jwí bohéatdih búdí ã yap yohna caá. Pánihna,  
 caandíh ma túi chãja chaáh, meemdíh yeejép ã  
 chãjcat pínah niijná.

16 Roma tútchidih moón ï maáta weemdíh ï  
 jwíih úbh joyóchah, wã chãjatjidih wã bohéatdihbut  
 queétdih wã naáwáchah, det weemdíh teo wáacnit  
 pínah ï wihcap be. Úmmit, nihat weemdíh ï  
 cádah bejep be. Obohjeéhtih, páant weemdíh ï  
 cádahachah yuhna, Dios queétdih ã peéh chãjca bojo  
 naáh. 17 Weemdíh páant ï cádahachah yuhna, jwí  
 Maáh Jesúsboó ã teo wáacap be, ãih doonádih wã  
 naóh beedáát pínah niijná, nihat judíowã nihcan-  
 nit ï joyát pínah niijná. Jiowã panihnit weemdíh

\* 4:10 2Co 8.23; Gá 2.3; Tit 1.4 \* 4:11 Col 4.14; Flm 24 \* 4:11  
 Hch 12.12,25; 13.13; 15.37-39; Col 4.10; Flm 24 \* 4:12 Hch 20.4;  
 Ef 6.21-22; Col 4.7-8 \* 4:13 Hch 20.6 \* 4:14 1Ti 1.20 \* 4:14  
 Sal 62.12; Ro 2.6

ĩ mao yohat déedih ã túi wapap be. <sup>18</sup> Nihat weemdih yeejép chãjnitdih yap yohnit, jwĩ Maáh weemdih ã wapbipna caá. Pánih wapnit, jeáboó maáh ã jumapna weemdih ã túi bejat túutbipna caá. Páניהna, yeó jáap jumap pah “Caán chah túini, chah wẽpni Maáh caá”, jwĩ níj jíih. Páant tíi ã jumap nah.

*Ã pée túyat túut*

<sup>19</sup> Prisca, Aquila, \* Onesíforo\* ã pebh moonbút ĩ túyap naáh. <sup>20</sup> Erasto\* Corinto tútchiboó ã chãwáp jí. Trófimo\* Mileto tútchiboó tubúp chũhnit, ã chãwáp jí. <sup>21</sup> Meémboó mah noój láa játih waícanjeh ma jũúwú. Eubulo, Pudente, Lino, Claudia, nihat bita Jesúihwãbut meemdih ĩ túyat túutna caá.

<sup>22</sup> Jwĩ Maáh Jesucristo majeéh ã jumap naáh. Dios yeéb nihatdih oinit, ã túi teo wáaca naáh.

Páant bóojeh tigaá wã naáwát.

Pablo

---

\* **4:19** Hch 18.2,18      \* **4:19** 2Ti 1.16-17      \* **4:20** Hch 19.22; Ro 16.23      \* **4:20** Hch 20.4; 21.29

## **Dios ã jáap naáwát tólih New Testament in Cacua**

copyright © 2008 Wycliffe Bible Translators, Inc.

Language: Cacua

Translation by: Wycliffe Bible Translators, Inc.

### **Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Cacua

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

---

PDF generated using Haiola and XeLaTeX on 21 Feb 2024 from source files  
dated 29 Jan 2022  
34c9543b-57a6-5290-ab7b-4fa15529a7e2